

歐

北

集

甌北集卷四十五 癸亥

陽湖 趙翼 雲崧

癸亥元日

朝衣檢點候雞鳴遙托心香拜玉京
南國柳梅春最早中元甲子數方盈
寢兵計日馳三捷納稼連年溢九耕
天不禁人無厭請又爲今歲祝秋成

覽孫以小除前一日生元旦抱見已二歲矣戲賦
歡聲繡褵出堂來正屆新年淑景開
生甫四朝年兩歲此兒應是早成材

兒女青紅喜過年誕生便有吉祥緣
洗三纔把金錢浴又佩新正押歲錢

看燈

何處譁聲溢市閭
葛仙橋北露華初
廣場千步春燈滿
月走游人火走魚

新春卽目

東風冉冉到天涯
老向人間閱歲華
死盡故人成魯殿
占先春色有唐花
魚龍雜戲紛千隊
簫鼓歡聲溢萬家
自是太平真景象
今年應又慶簪車

劉瀛坡總戎七十壽詩

雍容裘帶翊昇平
早遂初衣舉壽觥
福將臨邊無恙報
巖疆專閫有威名
老猶射圃千鈞發
春正花朝百卉榮

生辰在
花朝

象笏滿牀籌滿屋

公子皆
入仕

懸弧盛事出江城

新春招劉檀橋中允莊迂甫贊善洪稚存編修蔣
佩荃檢討讌集草堂適曾賓谷運使枉過遂并
邀入會皆詞館也江鄉此會頗不易得爰作詩
以張之并邀諸公屬和

五人詞館共家居合有春醪折簡呼廿榜輩行吾獨老
一堂風雅世應無占星或擬賢人聚入畫堪追學士圖
科目最先杯最後主人笑比飲屠酥

百年人物出柯亭故事猶傳舊典型兩髣霜甘居退院
一條冰恰稱寒廳是日誰當牛耳操剗澤我敢龍頭占管
寧林下漸多朝右少諸公應早赴彤廷

辛盤正擬具壺觴忽有干旌過草堂未便帶符韓尉坐

已如里改鄭公鄉儒餐野味無官解翰苑虛名漸餽羊
扶起雅輪須大力期公北斗領文昌

江陰道中

春陰風雨黯孤舟塵事勞勞愧白頭兒女債多何日了
江山景好別人遊海深塊石填難滿漏盡芒屨走不休
無可解嘲聊引古唐風蟋蟀職思憂

巨超練塘兩詩僧自焦山過訪枉詩投贈卽次送
別

焦廬北望暮雲遮飛錫何當款帳紗晴久麥芽初得雨
春遲梅蕾未開花林間吟社僧分席天下名山佛作家
準擬今年來結夏鶴銘磯畔落帆斜

送彥兒赴崇明教諭任

仕籍幾難繼寒種尚正途幸非男作匠聊說世爲儒接
士勤三吐論文舉一隅此官多暇日莫忘讀書劬
汝本馮河莽天教渡海行俾嘗風浪險始覺夢魘驚涉
世類如此持身詎可輕凜乎如朽馭跬步視初程

璞函姬隅集令嗣少鈍已爲刊行翻閱之餘泣然
有作

故人已殉蜀山高遺稿猶看戰伐勞歸骨難歸千鳥道

斫頭便斫一鴻毛

國隆卹典官修祀

已奉旨入昭忠祠

天報忠

冤子擁旄

少鈍已嘗成都守

可惜韓陵碑手筆不教畱賦洗弓刀

題竹初白述文

趙岐斲墓石司空誌生墳竹初自述文亦以代家狀讀
之見其真自處尋常人一語無矯飾詞罕意彌淳古來
三不朽皆出常人手祇此擇地蹈循牆走身不踰檢閑
官不曠職守得時可奮幹濟功不遇亦作釣游叟豈必
鼻息衝雲漢脚步踏星斗穿漠滓界透險重遊閭閻鄉
隘州九然後魁奇絕輩流倣詭賊儕偶君今安其常乃
更謙而光若論名行及才藝我覺此文猶未備學有兄
在專師資謂令兄文啟公產比仲多均活計待仲兄篤恩流出無官謗民歌
襦歸有去思人墮淚宰鄭縣以病歸餘事更兼風雅宗詩思文心
兩精銳工書善畫各入微學佛求仙並深契倘得巨手
爲鋪張將垂史乘芳更炳金石光君乃不乞韓歐陽并

不假趙子昂董其昌自搦一枝雞毛筆直寫素履無避
藏想見寒窗夜深悄熒然一燈含毫邈一念不將衾影
欺寸長未敢竿牘表此卽供狀到閻羅不用減增另具
稿偉哉此正非常人只把常人之事了

題江陰單寧齋明府小照

披圖想見十年前績學餘閒結靜緣年少仙人王子晉
風流詞客杜樊川杏花紅潤含宵露柳葉青舒抹曉烟
身未出山春意滿早儲康濟待敷宣

我見先生已有髭琴堂單父正調絲早栽滿縣花千樹
但飲澄江水一卮薦牘共推三異最御屏應覺九遷
遲此圖畱作東山景聊記潛居舊履綦

題左蘭成詩卷

一編冰雪淨聰明占得清新兩字評
不數當年庾開府
江南今又一蘭成

綺麗清才出水蓮工夫那更似珠圓
只疑數十年成就
誰識安仁正少年

師門衣鉢數袁王

嘗受業於子才夢樓之門

是我同遊舊輩行
今日兩

人俱宿草傷心忍作魯靈光

不因貲算掩才名絕似崑山顧阿瑛
好掃花陰遲老鐵
輓杯來泛草堂清

同兒孫上塚

出郭扁舟一葉輕
新蔬上塚正清明
童孫喜見春光好

折得桃花帶進城

閔邸報秦楚蜀三省同時奏捷軍事告藏喜作凱歌

露布星馳到玉京
饒簫大凱溢歡聲
雨來盡洗川原血
風掃都成草木兵
豈有盛朝容伏莽
從看率土淨銷萌
莫輕一片紅旗影
多少軍儲始告成

久享恬熙習故常
時艱始見國恩長
七年征繕無加賦
幾處流移有發倉
驅犢歸犁荒地草
課蠶重理故園桑
遣黎灑泣私相語
都賴朝家續命湯

蕭蕭班馬過歸師
西土依然好繡圻
天下江山奇絕處
積年盜賊掃平時
烏烏聲樂征人幕
鼓角風清大將旗

烽燧盡消天日朗彩霞五色絢晴曦

秋杜詩成喜氣重深宮五夜第勲庸裹屍馬革三壇祭
錫命龍章五等封遠戍兵歸身脫劍大酺人醉手扶筇
潢池何代無征勦駿烈今堪勒鼎鐘

今歲閏在仲春春光較多一月而風雨連旬晴和
反少於往年詩以誌感

枉着天公問仲春風風雨雨動兼旬百花不是黃楊樹
也似身遭厄運屯

正喜春長緩緩過暗中偏已減陽和可應天亦隨風氣
近日人情口惠多

偏仄吟成一兩宮匹鞮難踏落花紅仲殊詩句聊堪慰

春在濛濛細雨中

結習

不知何事日匆匆
食蓼搬薑習未忘
身後名難膏朽骨
案頭書且沃枯腸
清齋誥翻經課老
學荀卿炳燭光
捲起董帷還一笑
有人晞髮向扶桑

重三出遊

年紀七十七
風光三月三
力猶能健步
景更引幽探
臨水觀魚戲
尋花共蝶憨
陽春無盡藏
多取不嫌貪

野步

同此光陰逝
水流與其枯
坐不如遊
野花晝暖香迷蝶
古樹年深大蔽牛
不著胭脂春自麗
但聞鷄犬境逾幽

只慚賣酒人家笑此老無錢掛杖頭

前歲作牡丹詩頗不愜意今日對花再作四首

更無花可鬪芳菲飽受陽和始吐輝
詞客文章惟宋艷美人姿態有環肥
人因貴重皆矜寵蝶亦溫存作軟飛
騙得遊春忙十日滿城栽盡綺羅衣

紛紛桃杏盡開過晚出從容燦曼陀
十戶貴猶嫌價少廿番風獨占春多
光浮花外三分暈味在香中一片和
只恐女郎嫌太重不教插上髻盤螺

園林無此不能豪旁護朱欄上碧綃
畫以胭脂猶欠活生來富貴自多嬌
花頭端重風迴陣粉靨醺酣酒上潮
最是精神全發越線晴驗取午時猫

穠華恰趁艷陽天
繭栗開成徑尺圓
紅藥自甘充婢賤
青蓮曾以喻妃妍
豪宜黨尉銷金帳
陋笑蘇家藥玉船
佔得繁華仍不俗
由來姿韻本花仙

邸抄

闕宮齋宿翠華過徂徠驚傳起馭
娑幸有扣刀娥永樂
早擒觸瑟莽何羅
地嚴姦宄那藏匿
福大神靈自護呵
不究根株速成讖
如天

聖度所全多

偕王仲瞿孝廉蔣于野秀才游洞庭東西兩山時

吳縣湯明府爲治裝

足跡半天下
南戒徧登眺
家鄉有名區
垂老乃未到
枉

自稱好遊將被向平笑邂逅天假緣偶泛吳門櫂洞庭
近百里山靈默相召辦裝有賢侯結伴得同調遂果此
願償湖山領佳要胥口布帆開一鷺已前導

洞庭本湖名今名湖中嶺七十有二峯東西列屏整開
有靈威書禹跡藉導引鴻冥周里村龍隱柳毅井明知
語荒唐烏有如捕影卻因流傳久典故千秋永遂令好
事人雖幻亦引領豈慕湘瑟鏗寧尋鄂被冷一聞茲山
名恍在九疑頂微雨忽空濛恰作瀟湘景

探奇先東山村落何葱鬱田少人戶多不俱一頓粥卻
因營貿遷術善操盈縮遂多擁高貲鱗次總厦屋其俗
況淳朴目不見可欲隨時山有果過午市無肉相見各

愛敬善氣藹可掬人間真樂郊安得一椽卜

莫釐最高頂俯瞰全湖光三萬六千頃滌汧盪我腸其
下多奧區妙又在隱藏面湖忌淺露每借山爲障山所
不障處護以竹木蒼最好古雪居濃綠森千章不知上
有天但覺翠幕張清風颯然至毛竅俱清涼何當來結
夏快此被襟當

西巘有絕壁其腹忽嵌空不斧鑿而破不棟杗而穹造
物亦好奇做人智力窮創此無梁殿犀豁占百弓仰睇
衆硯礪一一倒挂胸壓卵倘一落命在蠶粉中巨壑終
渾成萬古含絳籬遂覺此頑石八面開瓊瓏圖圖質雖
蠢混沌竅已通不知命名初何以呼石公

林屋古洞天一穴入地底相傳通峩嵒誰與證遐軌我
來秉炬探實可五六里蝙蝠驚火光撲面亂飛起其下
坎陷處膝行不得跬匍泥滿身笑比負塗豕過險又
空濶一喊甕聲唯恐有饑蛟藏口饒奮舌踢老膽亦生
怯路恰隔凡止洞盡處有隔凡
二字王鑒所書迴身作猱升經時始見晷乃
知向所歷湖在頭上矣

昔有席允來湖樓寄嘯傲乘興泛湖回放鶴先歸報紅
粉盡出迎笙歌兩行導又有徐尙書宦成得予告猶令
修官書設局此囑喚號召諸名士空集赴蘭棹嗚呼彼
二人一富一貴要各擅意氣豪湖山增照耀至今訪遺
迹已無地可弔何況我輩來偶然快登眺他年鴻爪痕

誰記王蔣趙

吳門喜晤王述菴司寇值其八十大慶作詩稱祝
兼簡錢竹汀宮詹

垂老故人無幾見邂逅相逢適我願到蘇聞公在虎邱
急往相尋艇如箭欵門不暇敘寒暄先認五年別來面
喜公壽骨倍峻嶒頤頰增長一寸半視聽兩官雖漸廢
聲如洪鐘聞者戰高名動人戶屢多竟日將迎弗告倦
始知天子老健身特教歸作靈光殿繫余年亦七十七
幸附殷兄列行鴈寓公况有錢穆父齒序亦堪後勁殿
竹汀少
余二歲一朝都聚吳趨坊共詫老人星出現看取江南三
老圖明日家家畫團扇

京口左蘭成畱飲

柔櫓輕帆兩日程近遊重過潤州城欲談舊事無同輩
喜結新知有後生酒陣酣搖甘露剎詩濤雄闕大江聲
坡公會醉藏春塢刀景純題見蘇集此地常多地主情

借佩香悟情放舟遊焦山詩僧巨超已往會稽是

日佩香治具

仙侶同舟泛白蘋清遊不怕孝然嗔山成浮嶼環銀浪
人逐凌波步轡塵瘞鶴有銘傳逸史燒豬無竈欸來賓
行廚卻累麻姑具飲我鮮腴出網鱗鮓魚變出網更鮮

畱題巨超寺壁

無友尋方外有山在水中如何蒼耳子空墮白頭翁聞

往若耶寺應貪射的風我來偕翠袖顧盼亦堪雄

到揚州沈既堂前輩畱飲話別兼訂蘇杭之遊先

索和章爲券

我昔客揚州詞館列末座有酒必互招有詩必共和春
花接屐探夜雨對牀臥生平朋簪樂興發不暇情何當
二十年十九入楚些俯仰一傷懷駒隙蟻行磨今茲再
來遊碩果公一個人以罕見珍得不當奇貨喜公精力

強豪氣弗稍挫書燈久逾味詩脾日有課

公自號味燈老人日
以詩脾集字爲句

足覘老不衰耄耄可預賀我也雖後輩馬齒乃較大亦
幸腰腳頑未至憚勞憊相見各無恙喜極淚翻墮人當
暮年來萬事付一唾惟此故舊情入骨不可剝一尊軟

腳筵不覺成久坐明知後會稀且禁勿道破安知古佺
喬不是我輩做臨分更先訂蘇杭秋振柁我歸當掃門
佇候蘭橈過

再遊金山

金銀宮闕水當中獨上層椒放眼空山勢蓬壺境界
江聲桴鼓女英雄雕闌俯瞰千層浪渡舸通行四面風
堪笑帆檣日千隊更無一个釣魚翁

鎮江看都天會

羽衛何琴麗神遊出正衙香烟三里霧仙幟玉雲車

檣架

用小兒六七人扮
故事高三丈餘

擗鼓聲傳警靈旗氣辟邪客行承寥寂歸

路得雄誇

途中雜詩

洞庭遊了又焦山更指揚州寶塔灣老去翻成游蕩子
蘭橈一月不曾閒

詩翁八十尚兒嬉遊侶居然挾兩雌鎖骨觀音散花女

天教狂煞老頭皮

佩香悟情

鶴銘隄上贊公房曾與吳均共對牀回首雪鴻成故迹

瀕行爲拂舊題牆

昔與吳激楚李齊生同遊焦山宿巨超禪室今激楚先歿矣

左思賦已歷詞壇一序何須乞士安自是老饕多口福

累他珍饌上牙盤

左蘭成謂飲肴饌極精屬余題其詩本

巨超行腳未曾迴剩喜清師半日陪笑指牡丹添貴種

花時日日望公來

至高旻寺清涼上人設齋指院中牡丹數十本皆別後添種惜已開過矣

虎賁曾感孔融情爲是中郎舊典型今日故人餘筆塚

把君臨本哭蘭亭

練塘書學
夢樓遺言

軟腳華筵爲我開典衣治具意堪哀衰年未必還相見

何忍堅辭餞別杯

既堂

當日看花兩白頭碧筒杯飲最風流十年重泛紅橋櫂

忍過張家高詠樓

傷松年
之歿也

幾載相思暗淚痕何當握手轉無言僮奴只怪過從數

三日僑居六款門

齋生

費盡遊貲到處過爲尋詩料引清哦詩囊無何錢囊罄

大笑先生折閱多

江邊鱗魚

出網卽入釜頃刻判生死下箸正鮮腴忽然念到此

卽景

中元數盈歲癸亥人傳今年水勢倍自春入夏雨果多
其慮郊原漫成海平陸旣添瓴甃防窪鄉并戢舟楫待
一聞怒雷驅雨聲失箸心驚岌岌殆我笑出岷何太癡
偶逢旱潦輒怨咨常年望雨今怕雨直欲乞天爲轉移
愆陽伏陰亦天病天病卻倩何人醫不如少安俟其定
勿藥之喜會有時君不見午節傾盆秧水足詰朝翻犂
見晴旭高田不溢低不淹萬頃新苗一齊綠

水嬉看夜船燈火

水嬉豪舉擅龍城雲渡游船徹夜聲燈火熒煌星萬點

笙歌嘽緩月三更繁華知費金錢幾風景真看玉燭明
恰是村農插秧候中宵便起叱犍耕

今年添製夜龍船十丈龍身萬燭燃映水頓成星宿海
騰雲應上欲摩天一般犀照光尤徹遍體驪珠警不眠
惹得老顛清興發孤燈揮翰鬪蜿蜒

和資生別後見寄原韻

揚州寧復夢特爲訪君來情結相思草年誇不謝梅

木

中地名
今借用

別逾懷舊誼老自覺凡材不是逢深契何因笑口

開

屈指論交舊盟壇欣謬叨典型前輩老湖海四方豪坐
久雞晨唱詩成鬼夜號知君有同感十已九黃蒿

通籍早辭吏

成進士即
就教職

身謀未盡非官閒聊當隱俸薄尚

勝歸裾屐過從久雲山色笑違殷勤此良會可惜又分
飛

或以余紀遊詩於佩香悟情多諧語賦此解嘲

遊仙偶遇李騰空莫漫相嘲白髮翁但看晚霞多麗景
何曾老樹不春風風流得罪猶堪恕道學爲詩究未工
君見梅花一篇賦如何不議廣平公

步虛身豈落塵縉世眼相看總錯疑出水蓮原無染處
沾泥絮已不飛時漢臯明月空貽佩巫廟靈風儘滿旗
仙女欲畱名在世幾曾禁斷夢雲詞

快雨

打麥聲喧正熟梅濕雲俄起殷其雷天公不待人開口
將要栽秧大雨來

爲徐山民待詔題其夫人吳珊瑚遺稿

一卷蘭荳點筆成清才值得被他卿若非蕭史親傳出
誰識秦樓引鳳聲

顰桃啄絮也清新尚是人間粉黛身今日麻姑壇下拜
始知世有女仙人

畫眉纔了便拈題香閣聯吟到日西千百年來曾幾見
人間如此好夫妻

原是瑤臺暫謫仙早應歸去大羅天只因奉倩情難割
畱住紅塵二十年

遙識空牀簟滿塵一看遺挂一傷神
黃姑縱有天錢聘何處還求此替人

微波惜不早通詞鶯脰湖邊展謁遲
公幹自慙平視福美人歿後讀遺詩

抄詩

老去耽吟興尚豪一聯枕上自推敲
詩成急起瞻清本不待兒抄手自抄

題范鐵琴秀才詩卷

一卷新詩見苦吟鏤金錯綵用功深
就中懷古悲歌處直把皮絃扣鐵琴

丸藥

年老漸衰病妄思飲上池不嫌丸藥婢但少折肱醫體
製彷彿子火功叅煉師合成翻自笑命豈在參著

刻集

刻集如行師所貴馳先聲先聲所到處早使聞者驚淮
陰破趙壁傳檄收燕城龍驤指建康勢已破竹成倘無
此聲揚往往爲敵輕誰肯望風靡方欲對壘爭必待鬪
實力始得判輸贏已讓常勝家未戰受降旌所以有才
者爭先驚虛名繫余性蹇劣出未交公卿歸又守田廬
不糾壇坫盟毋怪同輩流相顧笑荒僮且勿計目睫或
可待後生

哭臧齋姪

京華鄉國鎖相隨何意今成永訣時君過八旬寧有憾

我無一件乃真悲阿咸年轉如兄長君長余四歲王濟談能辨

叔癡問疾只嫌闇拒客不教覲縷訴心期

尚書家法儼條科恭親紉佩書紳服習多座有金人緘口

戒君識於言自號緘齋庭無車子轉喉歌恭親遺訓門內不許演戲至今遵守躊躇見客憐

盤辟晚年不更於行飲啖兼人笑活羅二字見金史世紀君善飲啖今日追思總陳

迹黃公爐畔渺山河

李曉園廉使舊守會稽修蘭亭故事讌集賓友作

稊游圖今來索題為補書數語

洛陽履道里舊本楊憑宅一落白傅手遂獨擅勝蹟午

橋中令聖後歸張師亮至今綠野堂人只說裴相惟有

謝公墩介甫偶戲爭千載兩安石竟共佔令名由來人
與地輕重兩相繫或積後來薪或附先馳驥會稽有蘭
亭故屬王右軍誰敢冒不韙欲來作替人曉園風雅宗
忽作茲郡守似天將此亭鄭重付其手果然清興發上
已集賓友一時盛事傳不滅晉癸丑卽今已遷官曳履
凌星辰行看益展布迥豎鐘鼎勲名流行樂處草木皆
垂芬此亭舊游迹好繼稊帖文縱未遽突過亦當與平
分

題朱春亭虎山小隱圖

我倡懷杜閣遂并祠曰蘇此皆古之人已非時所趨胡
爲君結鄰步履連牆隅想見襟懷曠欲與古爲徒

漫興

十笏香嚴遠市囂不農不仕不漁樵尚耽書味忘漂麥
未長詩功想握苗著述身將盈八秩昇平世已歷
三朝閒中卻數平生友幾個聲名在絳霄

山塘

半年刺繡積千錢雇得山塘一日船來到可中亭子上
嫣然顧影女遊仙

水車

平疇雨足水車閒閣在村旁似棄捐獨有老農勤護視
今年不用有明年

詩思

才盡江海志未灰苦無詩思出新裁笑同農父翻車竭
只望憑空有雨來

出門

襖被攜來便出門只餘兩僕近隨身老夫作客輕裝慣
多帶一繩當一人

行李無多易治裝宿春也費一番忙草驢似欲驕人富
行不齋糧滿地糧

近遊

出門隨處是詩題收入篷窗任取攜倒影高天翻在下
上弦初月似生西晒簪竿蠹平蕪岸賣酒旗飄老柳隄
卻笑向來矜閉戶徒從甕裏作醯雞

揚州

西津又喚渡江舟直似鐘鳴夜不休
白雪滿頭花滿眼
一年兩度到揚州

揚城北小五臺前河水最急孤舟逆上頗有戒心

率賦

揚州北去尙城濠小五臺臨水勢高立剎巧摹師利院
建甌增壯廣陵濤孤舟刀鬣浪三尺數口命懸絳一條
曾叱河神爲小婢老來氣已不能豪

舟過召伯埭

汭流送故人正值秋濤壯召埭地勢窪衆水所畢向河
湖乃混合線隄弗能障隄外本村墟俱入湖光漾其有

未浸者四面空所傍但見樹影浮漸少炊烟煬可憐編
葦牆半截已在浪米鹽何處求出入憑兩漿嗟哉昏墊
民長恐魚腹葬當年謝太傅胡爲築城伉想當典午朝
沃壤尚平曠淮流獨到海不向此奔放自從河南徙淮
無路可讓翻借清刷黃洪澤作水藏高堰有危急尾閼
洩怒漲遂令下流地原隰入漂蕩生無餬口田死無埋
骨壙我來一櫂過驚波白彌望水不行地中人乃坐天
上

隄上苦茅者

隄上茅棚浪半傾往來客尚代擔驚居人卻見滄桑慣
猶唱吳娘水調聲

高郵詠古

百雉秦郵一彈丸舊曾置郡總師干

元時設府治

城邊河繞三

門曲樹外湖搖萬頃寒突戰護糧亾國將

宋姜才來取糧與元兵戰一晝夜

諭降被刃大科官

元李齊為郡守被張士誠誘殺

始知平世文游樂詩酒風

流侈玷壇

文游臺故址尚存

舟泊汜光看孟蘭會放湖燈

一燈兩燈千百燈滿湖熒煌炳繁星孟蘭盆借佛亭相
放大光明豁沉冥人燈放入鬼界去陽火變作陰燐青
是時湖天夜昏黑黑中正顯燈光出一燈一鬼爭來擎
涼燄不愁炙手熱暗飛忙似萬點螢自照羈覓欣解脫
漆天墨地枉死城今夕朗開覺路徹夜叉羅刹不敢攔

爲有一道紅光赫魚龍不知徒驚逃何暇燒汝頭額焦
甃社有珠恐被掣老蚌亦復閉口半迷津後渡有如此
萬荷花裏歡聲囂斯須燈散了無跡皎月當空一輪白
見村叟納涼者

村叟聚成羣乘涼坐夜分撒灰噤吠蛤蕪草僻飛蚊占
雨無奇術談天有舊聞兔園三四句白負頗通文

到揚州值松坪子次生新抱西河之痛至淮安問
晴嵐子蔭堂久下世矣感賦

題襟好友已松楸那更風摧玉樹秋哭到故人三兩世
感深倦客一孤舟當年曾羨駒千里今日俱歸貉一邱
早識此行多引淚悔攜襖被出門遊

清江浦送費制府入爲大司馬賀遷惜別情見乎

詞

聽履崇班躡 禁廷本兵身繫九邊寧

帝資海內安磐石民惜江南去福星敎厯官更中外職

追攀人滿短長亭還朝笑憶郎曹舊三十年前髣尚青

平日人忘厦庇中臨分始識久帡幪祈年常滿千倉粟

自公到江南連年大稔戊午歲穰雨尤驗率屬俱寒兩袖風竹箭河流循軌穩頻歲

池河漫工皆速堵崔村兵掃伏陞空指去歲宿州勦匪事而今一一勲庸見都

作甘棠憶召公

腐儒縱不乞餘光自有餘光到草堂執醕敢當三老席
指囷終恃陸家莊孔融檄改康成里恩照車臨履道坊

牛僧孺舉制科白樂天爲考官後自退居東都履道里牛爲留守時相過從

十載分榮誰不羨真看桃李

蔭門牆

送別那禁淚暗垂雲山從此兩睽離建牙或有重來日
毫齒應無再見期帷幄謀參溫室樹江湖身老釣竿絲
衰殘倘尚遲留在會聽黃扉入論思

寄汪時齋總憲

五十年前舊對床江湖廊廟遠相望閒思談讌成前夢
老仗門牆借寵光退士身爲壘畫烏清卿俸比東修羊
相思但祝加餐飯各已龍鍾兩鬢霜

自袁浦歸途作

憶昔來袁浦旌麾迭迭迎一隄三十里八座兩門生

時蔣

南漕督駐淮城費
筠浦制府駐清江
聚散踪無定
暄涼景倏更
江程獨歸處
尙有月隨行

歸途阻風

歸舟遇逆風
所恃順流捷
水爲風所捲
順流亦成逆
遂覺風與水
兩力併一扼
清淮十丈河
學作海水立
濺浪劈面來
白日擊霹靂
水撐兩篙彎
岸挽一緯直
邪許力已盡
進寸尚退尺
由來年運衰
動輒有阻格
姑令柁杙待
勿與爭旦夕
已甘鵠退身
寧競鶩趨迹
敬謝風水神
微命不足嚇

途中偶見兩樂事感賦

倦則知還戀
舊窠物情杳
去不爭多卸
鞍跑馬歸芻
棧

脫輓耕牛放草坡
少日漫思雲出岫
老來惟愛水迴波
天寒翠袖幽居屋
且喚蓬頭婢補蘿

經高寶諸湖

淮浦秋風感浪淘
金隄無恙已滔滔
水猶只作尋常長
地不能增尺寸高
土價論錢修築苦
河流沉璧禱祠勞
障川終古無長策
祇望陽侯戢怒濤

瓦窯鋪

召埭南來極渺漫
并無隄岸可登扳
臨深始覺爲高易
一見窯基便當山

揚州別諸同人

綠楊城外曉迴舟
送我知交總白頭
那不臨分重執手

來是別揚州

竹初齋中盆蘭多名種今年爲春寒所敗其次者
作花尚茂賦詩索和卽次原韻

九畹姿從短取長好嬌次第替夷光精神雖覺三分減
臭味仍同一瓣香萎豈當門遭刈楚榮留紉佩慰懷湘
謝庭不斷清芬苗韻事終勝馬糞王

磁斗嬌芽冷不禁護花方法更披尋縱非首選猶青眼
難得肩隨亦素心開晚忍嫌抽箭少耐寒應爲植根深
只愁藉口停嘉宴辜我年前望到今

去歲有盆蘭之
宴故戲及之

稚存自焦山歸謂同人作詩無切定焦山者余戲

擬一首卻不用焦山一典

潤州城外兩浮漚此獨長存本色幽空谷佳人攏翠袖

縕袍寒士對孤裘

謂金山相對也翠鳥名故對孤

一龕裂石難容膝萬樹藏

山不出頭卻笑往來京口渡千船不見一船游

又擬一首專用焦山事

此山從古本無名卻被焦生作主盟地僻一龕高士臥

時危萬舸水軍爭

張世傑與元兵大戰焦山上

縞衣銘記胎仙迹

落鵲

白鶴

船悲血戰聲

元人獲白鶴船七百

誰彷彿金山留帶事平添寶鼎鎮鯤

鯨

開阮芸華中丞施一寶鼎與寶鼎同作鎮器

長孫公桂舉一子老夫遂見曾孫因名之曰曾慶

而記以詩

中年得子已嫌遲

余年三十八始舉廷英

豈意孫今又舉兒天幸已多

真忝竊祖功久積有留貽老妻檢篋裁文祿賀客填門
索酒卮笑語鑷工休鑷白輩行恰稱髻如絲

遂向人間作太翁添丁應策長孫功三班銓尚遲需次

孫方候
選縣丞

一索占欣早得雄爲父也須身作鵲抱男漫謝夢

符熊百年世業青箱在要續書香振祖風

送邑侯高松亭調任宿遷

六載循良績賢聲浹萬家猷爲兼有守惻惻更無華民
已相安久君無別望賒如何留不住忽駕北轅車

徐泗殷繁地端資治行高官應從此貴心又一番勞郵
傳連三省漕渠過萬艘精強原素慣游刃亦堪豪

河決封邱岸鄉邦險剝膚地纔離咫尺家不損鎔銖

秋今

河決封邱距君家
纔三里全家無恙

昏墊災寧擇神明理不誣部民間喜信

比戶總歡呼

名已封章奏知難借寇恂去思今始見公論久逾真民
擬祠樂社君猶念趙人相期還五馬重布晉陵春

鼻涕

撲面風來酒力消懶殘鼻涕掛成條卻思年少粗豪處
一唾高於二丈橋

題邑侯周石雲暨令弟魯源聯床風雨圖

風雨聯床話錫原誼最親詩傳潁濱老君亦蜀江人竹
木清無暑軒窗靜不塵逍遙臺上景妙手爲傳真
江源到江盡萬里尚同遊恰帶峨嵋月仍輝花萼樓客

踪鴻雁影才望鳳麟洲

王世貞號鳳洲弟世懋號麟洲

定有聯珠集高齋共

唱酬

題管道明南北讀雪山房圖

尊人侍御公官京師有此山房若歸里掛書室仍願以舊名錄

竹初爲作南北二圖敬題於左

考作室子肯堂已覺門戶生輝光猶未遷地傳書香何

哉讀雪房昔本春明宅郎君南歸念先澤闢得新齋仍

舊額遂使三間奉禮廳京國江城兩突兀乃知名父之

子善繼承紹聞家學切服膺買宅雖拚編馬埒映書還

擬代螢燈會看世掌絲綸美踏雪趨朝玉宇澄

侍御曾直軍機處

喜稚存歸戲贈

送君去後無吟興待得君歸便起予笑比雪中狂鄭五

一夫詩在灞橋驢

歲會

歲會粗增什一錢居然阿堵滿牀前不知他日誰家物
煩我持籌數十年

彭芸楣尚書輓詩

同試鑾坡賦獨工

癸未散館公
第一余次之

清班敎歷到司空

帝將李嶠稱才子

公以文學受知
先帝有才子之稱

人忌元稹

平聲

作相公服

藥地黃頭早白

年未五十
鬢髮全白

校書天祿燭常紅

各館修書
皆為總裁

京華

文戰江城醺猶憶光芒夜吐虹

散館前與公會課數十次公
視學江南余里居過從尤密

甌北集卷四十六

甲子

陽湖 趙翼 雲松

甲子元日

璿圖景運慶升恒花甲重開喜倍增身歷三元上中下

余生於上元甲子之丁未今歲交下元甲子

眼看四代子孫曾朝正已免晨興早報

國惟祈歲事登生長太平將大耋古來詞客幾人能

先得

句云路經萬里東南北身歷三元上中下適乳媼抱曾孫出拜因改此聯

上元前後雨雪連旬率賦

正喜新春好何當雨雪滋天陰長晝短冰冷早梅遲
竟少魚龍戲惟聞簫笛吹笑摩挲竹杖且緩踏青期

季女出嫁

弱息生於晚寧圖遣嫁期那知歌在豈猶見結褵時
具慚率犬祥占祝夢罷勉旃修婦德循我舊家規
恰了向平願應償五嶽緣只憐婚嫁畢已近耄期年力
怯登山屐貲慳掛杖錢惟應訪宗炳畫壁看山川

近遊

新年燈火已全收漸喜春光到陌頭白髮本催人佚老
蒼生豈待我擔憂香浮嫩乳新茶盃風皺微鱗軟水舟
蠟屐敢嫌無勝侶不妨野老作同遊

檢閱近人刻集再題

江南落落幾儒英博物工詞總老成此等人皆關氣數
後生輩但慕聲名津梁絕學爲先導黼黻宏猷見太平

突過黃初雖未必斯文已迥勝元明

味辛銜恤歸泊舟袁浦爲他舟觸破脊屬僅得登
岸行李已大失稚存作詩相慰余亦次韻

奔星距家將咫尺十口命寄維舟索我我大艣何處來
順流迅若馬被策捩柁不及突我舟頃刻舫齋驚毀宅
幸已僥倖得逃命命外都作沉淵石千夫赴救不待呼
其識此官無隱隱胡爲河神獨不諒妄意歸裝可分拆
我聞水府愛異珍珊瑚木難務貪得護珠長救驪龍醒
貸粟肯憐涸鮒急泗流不放周鼎還宣房坐收漢壁溺
區區薄宦詎有此羔羊素絲守清白十年薇省判事忙
兩郡朱幡行部殖

攝登菱
二郡守

訴飢方朔語帶詠乞米魯公書

入刻一領朝衫兩皂靴論價不滿十金直此中安得有
厚藏致煩劫路儼強敵趁陽侯浪助作威借颶毋風來
壯色不剽猗頓剽黔婁怪肱隄無寸帛得非神亦我
輩人嗜書有癖忘漂麥瞰汝生平著述多光賽金膏掩
瑤碧遂欲截留瀧岡表弗顧塋期悞窀穸青洪不把如
願償翻逞雄威作暴客乃知橫禍本自招嘔盡心肝供
鬼奪歸來聊幸眷屬完回首風波尚餘嚇災星過度且
勿悲文字召殃宜自責小懲大戒神已示從此便應焚
筆墨倘猶結習牢不破窮穿溟滓攝月魄寸管思古千
秋名造物所忌定遭厄或遣雷電下取將或借潮風逼
收拾比似洪喬沉書瀨作戲挪揄必更劇

靜推

神仙逃劫佛消災真假機關試靜推老已到來無可諱
運將敗去豈能回枯餘岸柳春仍長落後庭梅歲又開
他是無知吾有覺那能長駐此耆鮐

題和韓遺訓圖爲陸秀農作

同年陸耳山副憲在京時嘗遺令嗣秀農讀書
城南永樂禪院手書韓昌黎符城南讀書詩并
和其韻俾作座右銘今耳山歿已十餘年秀農
奉其手蹟追繪成圖來索詩知其志切紹聞久
而弗懈故人爲不亡矣爰仍次韓韻奉題俯仰
今昔不禁悲喜交集也

世傳昌黎子曾誤金根輿後終成進士名入淡墨書良
由過庭訓誨戒腹笥虛至今城南篇想見勗學初析薪
竟克荷弗墜高門閭吾友副都公典策擅相如京華三
間解偏仄盆池魚亦處君城南蕭寺人跡疎手和示符
什俾懸佛屋渠勉以青雲梯平津起牧豬嗚呼儒家業
祇憑硯滴蟬弗惜食字蠹遑問浮甕蛆通經用斯致古
稽今與居縱不爲干祿舍此安歸歟君能體先志夙夜
勤所儲欲然不自足乃日見有餘會當巢阿閣寧憂困
豫且倪寬第七車功收帶經鋤我昔與副都長安共騎
驢早欽淹雅才筆耕勤菑畚果膺天祿校公奉命總校四庫書翔步
直玉除別來四十載緣每慳聯裾東粵一欸接公典試粵東余爲廣

守得過
從數日

南蘭一燕譽

公服闋赴都過
昆陵飲余草堂

爾後渺音塵况聞歸靈墟

披圖感存歿離懷慘不舒
書香幸有君嗜學忘居諸
題詩悲喜集中宵幾躊躇

生事

白粥黃齏度夕晨生平慨懣肯求人
卅年詩不言生事人道先生未甚貧

紅梅閣題壁

出郭尋春羽客家紅梅一樹燦如霞
樵陽未卽遊仙去先向瑤壇掃落花

春寒

乍暖纔欣脫左綿西風一夜又冰堅
老夫竊幸能先見

未把寒衣去典錢

觀餽雞者戲作

簸春餘粒撒籬間
踯踴呼雞恣飽餐
只道主人恩意厚
誰知要汝肉登盤

苦雨

正擬芳郊攬物華
烟村處處酒旗斜
連旬風雨無游屐
可惜江南好杏花

山茶花開卽事

節正改新火
火珠駢故柯
滿城一樹獨老幹
百年多欲奪燒丹
赤光增醉酒
酡倚闌相映
發不用障紅羅
草草具盤格
美名援戒奢
也知晶蠶飯
不稱曼陀花
無

酒望鄰富

味辛自搗佳釀就飲

有花貪客誇後期還預訂已苗牡丹

芽

山茶既開適稚存遊松江歸遂邀同檀橋竹初味

辛小飲卽事

閉戶何從逸興生
羨君到處有逢迎
詩名本不爭楊鐵
地主偏多過顧瑛
軟水舟纔千里返
衍波箋已百篇成
待君歸恰山茶放
笑我庭花亦世情

稚存說述菴侍郎近狀尚無恙喜賦

落落江天大蠶身
騷壇猶欲獨扶輪
詩文採到新先輩

刻湖海詩傳湖海文傳二書將告成

聾瞽幾成活死人

耳目已俱廢

嬰婦支錯工煮粥

每日但食粥

門生當杖代迎賓

門人

長安交舊今餘幾
數到殷兄

罕倍珍

塘橋北看杏花

看花翻爲好花悲
涵園旁邊杏一枝
野老不知花受屈
只言臭腐化神奇

戲書

豈不願作達出身
本陋巷經歷艱辛多
遂入愁魔障卻
看少年輩意氣何豪宕
行樂恐後時追歡窮所向
老者寸腸結少者兩眉放
一笑孔聖言有時或多爽
君子長戚戚小人坦蕩蕩

論詩

作詩必此詩定知非詩人
此言出東坡意取象外神矜

羊眠掛角天馬奔絕塵其實論過高後學未易遵詩文
隨世運無日不趨新古疎後漸密不切者爲陳譬如嬰
駕馬將越而適秦漸漉終南景何與西湖春又如寫生
手貌施而昭君琵琶春風面何關苧蘿顰是知興會超
亦貴肌理親吾試爲轉語案翻老斲輪作詩必此詩乃
是真詩人

題王牧良洗硯圖

不藉硯爲出何事勤洗滌只因素工書早入顏柳室磨
煤購張遇雞距選諸葛陶泓尤所珍珍逾一尺璧髯童
頗解事手濯寒流碧餘瀋散玄雲滓去見天質斑涵翡
翠鮮眼浸鴈鴒活纖埃淨不留墨乃如點漆棐几鏡面

光練裙冰痕潔興到一揮毫龍蛇十指出老夫竊自幸
蟹匡爲蠶績君書日益工使我乞代筆

余筆墨應酬
嘗乞君代書

自悔

宦途正好忽歸田妄意清高慕古賢三十餘年林下樂
天公待我原不薄只慚枉作讀書人未有分毫澤及民
到此始悔去官早雖悔難追身已老

上塚

掃墳回去日將斜慚荷殷勤野老家千里鵝毛無此韻
臨行折送碧桃花

繹夫

百丈牽官舫郵夫挽繹勞差肩魚貫柳蹢足螻循條俯

覺路直豎衝當風怒卑船中人晏坐顧盼氣方豪

彭殤

彭殤相遇道塗邊各述生前住世緣
有蟪蛄聽暗笑不妨童叟拜同年

登楊舍城樓望海

設險前朝築

明嘉靖間因倭寇築此

地傳古暨陽江完剛接海

地當江尾海頭

城僻只如鄉旭日扶桑影長風船舶趨檣
朝朝沙戶集午市最喧忙

偕葉保堂秀才遊楊舍城外顧氏廢園

平壤無山水爲園仗樹多喜茲三畝地
竟有百年柯矮柏臂旁攬高藤尾倒拖
稍芟蕪穢去亦足寄清哦

望壽興沙洲

沙洲漲出海中央爭築圩田在渺茫種得木棉天下暖

地產木棉最多

真成東海變栽桑

花木

誰言草木竟無知消息能叅造化奇不待司天頒朔到自然開落不愆期

劉少司馬信芳吾師文正公孫今相公石菴先生
從子也來視學江南相見話舊賦呈

星輻校士莅江鄉喜挹師門舊瓣香家學再傳東閣貴

交情三世北平長印泥鴻爪談陳迹

余客文正公第嘗賦幽巖碑歌時公尚未生今述其

事甚悉蓋家庭間嘗語此也

食葉蠶聲聽戰場早有先聲慰入望官箴奕

世凜冰霜

黃閣當年變理深至今朝野尚謳吟老成人是中流柱

清白門無暮夜金使節旌麾仍舊地

石菴舊觀學江南

紹庭桃李

又新陰韋平繼相尋常事難得家傳似水心

與少司馬追述文正公相業及余登第事感賦

一代秉鈞衡數不勝屈指獨論柱石臣落落能有幾吾

師表東海間氣出英偉鐵石宋廣平模楷李元禮華岳

立秋隼百鳥不敢視直聲震天下至今雷貫耳易名比

君實萬口同一唯生能重朝堂歿更光國史嗚呼相

業高非可一節紀我昔客公家每飯其素几

公門無雜賓日與余共飯陪侍

者公子今相國石菴先生

得習聞緒言披豁無城壘欲以身作霖先恃心

如水此段得力處竊幸窺根柢公家子敬書臨池擅絕

技

石菴公時爲孝廉最工書

我嘗摹仿之公笑頗形似後公贊樞廷我又

供役使

公爲軍機大臣余先以中書舍人在直

及辛巳對策恐坡識李薦私改舊

筆迹另作率更體公果不及知拔之冠多士

余素習顏魯書及廷試恐公以

素識避嫌另作歐陽體騰卷公果拔爲第一進呈

大魁雖旋失虛名自茲起士當貧賤

日每恨無知己何期爨下薪蒙賞斷焦尾馬旣顧空羣

蠅不煩弔死此情何能忘回首淚瀾瀾

衰老

莫怪交遊厭腐儒家居亦自歎羈孤滿堂兒女聞聲避

衆叛親離一獨夫

牡丹

春風滿面好容光十五盈盈出畫堂天下有花皆避席
豪家無處不飛觴寫生只合煩周昉入貢曾傳自洛陽
笑我素嫌脂粉氣也教軟盡鐵心腸

西干故里示姪亮采寶士姪孫公蘭等

十年不到綠楊村白首重來叩里門驚吠烏厖疑是客
舊留黃犢已生孫一經幸尚傳家學百畝猶當念
國恩是我昔時初奮跡辦香能不望蘭蓀

戲贈

氣豪畧不問生涯冷笑他人苦作家富貴性情貧賤命
黃齏吃了去看花

桐山齋中杜鵑花二十餘盆皆貴種每開時必治

精饌召客今歲又邀同諸公讌賞卽席賦謝并
索諸公賡和以張之

開應鵲啼候幾疑血染濃種殊山躑躅色壓木夫容移

豈鶴林幻蟠爲雁塔重

旁校盤曲作三四層似塔

主人真好事歲費酒千

鍾

共入三三徑來看七七花頓驚丹竈火欲賦赤城霞況
有牛心炙兼烹雀舌芽奇葩與精饌使我醉忘家

呂叔訥廣文刻詩文集見貽爲題五律一首以誌

欽慕

唾棄羣言盡途開奧窔深隱然成敵國嶄絕占孤岑膽
壯幾拚命思沉到嘔心老夫惟退舍聊惜墨如金

答友

日暮逾愁道路遙
老來何敢氣凌霄
誤人子弟由輕獎
欺世聲名恐易消
許靖終爲先主薄
歐陽猶畏後生描
祇應蟻垤防山顛
觀井鑊鏗帛繫腰

芍藥將開爲連雨
所壓今日天晴花
遂大放喜賦
紅藥開期已及瓜
那堪連日雨如麻
虧他忍俊能堅耐
過了淫霖始放花

見爭地者戲書

佔人寸地未堪耕
訟牒紛然訴不平
別有元龍樓百尺
卻無人以佔天爭

自遣

冉冉流光露電身浮華落盡剩天真清齋松下園葵味
通德門前帶草春安命敢期非分福讀書難得細心人
一編重展西窗易白首猶慚未問津

春遊

春好惟三月追歡要及時花繁紅鞵鞦天淨碧琉璃尚
少流觴會何嫌步履遲路旁人暗笑此老又尋詩

再到西干故里

釣游歷歷舊烟村相識曾無一個存莫怪老錢高自置
見人一概喚曾孫

感事

世事寧論目睫間忽高忽下似鞦韆安知失馬非爲福

等是瞻烏未定天賁育難提三寸筆研桑只識幾文錢
居然炙手雲霄上多少人思效脅肩

研桑見班固賁戲研桑心計於死根研計然名桑卽

宏羊也山谷詩安用研桑作老翁

有勸余畜聲伎娛老者戲答

哀樂中年易感傷故應絲竹遣流光豈聞白髮三千丈
猶耽金釵十二行蟻穴久醒槐國夢羊蹄恐踏菜園腸
衰辱自有尋歡處園柳庭花總色香

楊桐山再具精饌招飲賦謝

安得三百六十楊桐山使我日日飫美餐不然一百有
八十亦可隔日快餽啜老夫雖非飲食人每遇盛饌亦
覺珍且勿論豹胎熊掌猩猩脣鵝增四腿鼈兩裙但從

芻豢選肥美昔人烹飪有絕技濃乳蒸豚爛熾炭炙驢
死駝臍膺入饅雞羽精擇米此皆豪門矜秘方至今談
者津津齒君并不徂古食單自出新意調鹹酸所用不
過飛潛走獨取精魄遺蹄筌文火武火一晝夜恰如郭
虛舟鼎燒金丹遂使滿堂動色到屬饕餮顧脹斷腰帶
盤可惜一年一召客不作鄭莊勤置驛令我數日之前
早朶臆數日之後尚流沫從此腐儒餐入口總不適爨
婦被譙訶饕子受鑄責都恨楊家厨以巧形我拙一笑
大烹養翻爲衆怨集君欲息此謗譴興只有朝朝開宴
席

靈氛應召判前因運筆如飛果降真我是未成丹道士
世無不識字仙人步虛杳杳來何處叩寂惺惺信有神
人是古時詩近體知君學亦逐時新

水閣看競渡戲作

水樓坐看兩游龍過者爭疑美在中聊與諸君供一笑
捲簾露出白頭翁

虞石渠秀才枉贈長篇賦答

躍爐共指不祥金豈意牙絃得賞音趙嘏倚樓名句少
虞卿閉戶著書深探珠已握靈蛇寶識路空存老馬心
多謝瑤章枉投贈剪燈增我夜清吟

客有談故相事者漫記

具瞻當日秉樞鈞誰敢登車醉吐茵隻手難遮天下目
回頭已是百年身見錢益棺論定無翻案當軸權移有轉
輪官位聲名原兩事漫憑威力制窮塵

午節後二日方慕雲明府招同劉檀橋中允莊迂
甫贊善洪稚存編修蔣立菴楊星園兩太守龔
稼堂州牧蔣瑩溪別駕陳春山大令泛舟看競
渡卽事

常州龍船天下無今年賦雨愁沾濡天憐措大作豪舉
雲端忽翫黃金鳥主人發興大召客十千高價雇舳舻
長魚大肉咄嗟辦水晶之盤白玉壺客來大半雙髯皓
最少亦已蒼髯鬚俄看三龍蜿蜒到震天鏑鐃轟前驅

龍身幻出錦鱗甲金支翠羽紅珊瑚樓臺都攝寶光內
化作貝闕烟模糊遊船坐集競追逐奮力似欲爭驅珠
千艘萬舸無一罅辟道莫敢摩齏孤洛浦佳人簾影閃
扶風豪士酒氣粗老顛亦復風景裂醉倒不倩旁觀扶
昔人一樂動千古采石仙李黃樓蘇杜牧水嬉亦兒戲
竟其屈子傳江湖吾儕此會頗附縱不知可亦傳畫圖
劉松嵐觀察 大觀 舊嘗宰鎮安之天保縣在余守
鎮安後二十餘年矣茲過常州借稚存來牘具
言鎮民已爲余立生祠虔奉弗替感賦
南徼歸來已白頭鴻泥那復爪痕留誰知三十餘年後
尚有遺民祝故侯

自知無績可流傳只有碌碌不愛錢始識愚民原易感
不爲貪吏卽稱賢

在任原思死墓祠

余在鎮愛其民序事館賓
擬老於此官不願還也

豈期民已社樂公

不愁身後無歸處九聚蓮花一畝宮

赴鎮安必由蓮
花九黃而入

題邑侯吳盤齋小照

簿書那得有餘閒小憩空庭竹石間自是治才仙吏最
咄嗟能了案如山

燕寢凝香五字詩韋郎高韻令人思今看一幅蕭齋景
直欲風流替左司

五月中陰雨連旬低田淹浸今屆小暑尚有未插

秧耆感賦

梅雨方欣四野同翻悲澤國水浮空無官敢問民生病

不稼終期歲事豐犬上牆猶波恐及

蘇詩人隨雞犬上牆眠

蛙生甕

更火難攻家家懸釜炊將斷翹首爭瞻海日紅

倘遇凶荒我早貧只因憂已故憂民桑田幾欲成滄海

紕扇何由障路塵荇藻樹腰紫翠帶帆檣橋背過輕輪

絲秧交暑猶難插秋晚如何得食新

水車十百戽田水入河

修蛇蛻骨枯槁多邪許聲悲似晚歌可惜踏車如許力

翻將田水灌塘河

年年河水灌田禾田水今翻灌入河絕似甯人還宿債

羊羔利較本錢多

接同年陳蘭江書知其官金華教授喜而有寄

淮館聯牀兩月同

曾同客淮關
權使寅公幕

而今二十四春風書來別

雨離雲後官在青山綠水中歌袴尚傳秦百二

君昔字寶
雅改就教

職詩筒好遞浙西東開緘先喜音塵接已抵論心剪燭

紅

小暑後忽得快晴低田水漸退而鄉民又恨東南

風大不得速驅向蘇湖致插秧尚有待也詩以

解之

積雨新晴氣已蘇又嫌風不下流驅果然驅到鄰爲壑

我得春炊獨飽無

江邊

彌望郊原白浪消尾閭何處泄狂濤百川都向滄江灌
壓得潮頭不敢高

累臣

萬里累臣遇赦歸美余早退免危機當君旗鼓排衙日
却笑癡人守釣磯

少日

少日伶仃僅一身兒孫今遂列成羣人間米貴何關我
百萬分中也一分

黃鵬

水退家家補插秧炎歊炙出汗如漿黃鵬大有驕人意
濃綠陰中坐鼓簷

送人赴黔

因君遠赴黔歷歷憶郵程地有萬山險天無三日晴趁
墟官酒擔跳月竹枝聲都是奇聞見應供琢句成

牧童

西日銜山欲落遲晚風何處笛橫吹牧童豈解慕潘閔
也跨歸牛作倒騎

猝起

蘇松近事

猝起饑民掠食喧大官網竟漏舟吞不知拆毀張彝宅
可有旁窺賀六渾

水退

水退種堪補糧艱價漸昂人爭平糶米

官倉

田竊早栽秧

清秋已朽惟早歲者已發利
可以分半補時故多捐竊

歲事應無恙民情幸小康惟闕下流

地一半尚汪洋

聞蘇松尚有
不能補救者

溝壑

溝壑災黎待斃身相逢不禁爲傷神若教破我慳囊救
又覺他原是路人

甲子夏梅雨過多蘇州以下多被水不能插秧米
價頓長貧民遂蠶起搶掠直入省城一日劫案
數十百起城門晝閉三日稍定吾常地勢高幸
免淹浸而糧價亦貴羣不逞聞風將效尤余家
有米一困計一百二十石亟減價平糶市價每
升三十五文余僅以二十四文定價於是萬衆

畢集有無賴子突起搶米衆皆隨之少年女亦脫其裙中袴作囊盛得升斗嗚呼饑窘之迫人以至無忌憚亡廉恥如此自惟小惠招尤固自貽之感而民氣鬻然不靖大可慮也

嘉慶九年夏梅雨淋不止蘇松杭嘉湖水漲及千里有秧不得插糧價頓倍蓰貧民遂譁然搶劫以救死掠入姑蘇城一日數百起大吏禁不得闖闔盡罷市城門閉三日搜捕始稍弭吾常地勢高被浸畝無幾亦以糧價昂聞風動奸宄余家米一困亟糶慰桑梓非以種德殷亦豈邀譽美但散區區積冀免耽耽視誰知價過廉先聲播遠邇熙熙爲利來將我春臺比或腰懸囊橐或手

擊筭篋萬衆如湧潮轟闐聲沸耳有黠者一呼無錢可
得米競作躍冶金搬運捷五鬼强者負肩背弱者傷股
髀恨不手一雙多生百十指更有紅顏婦脫袴布裙底
但貪裏糧多弗顧失禪恥斯須百廿石攘攷淨如洗嗚
呼爲善難利人反害己方慚涓滴微恐傳訟獄理所慮
民氣驕目己無法紀茲事關隱憂蒼茫向天咫

余嘗愛東坡句潛鱗

有鱖鮓掉尾取渴虎益虎飲於河爲鮓所食也以十字寫之毫無刺義此搶米事
有鮓鮓磬內敲袴作囊盛米者亦欲以十字寫之初云脫袴有紅顏作囊裏白米
但袴外尚有裙故可脫今裙字意不見竟似裸露
矣故改作四句乃始數前人鋪句真不可及也

佳句

枉爲耽佳句勞心費剪裁生平得意處却自自然來

再過城東小桃園

少年曾此屢經過
腸斷韋娘一曲歌
今日重來頭已白
不知何事淚猶多

詩家

詩家徑路都開盡
只有求工稍動人
又恐丹青少生氣
嫋嫋徒作植麒麟

劉石菴相公因繼母太夫人就養在家孫少宰公
江南試院壽屆九十奏蒙

恩命南來慶祝公年亦八十五矣稱觴盛事從古未有
余以門下士敬隨叩賀歡忭難名恭紀三律

南國秋風襯穠香
相公請假壽護堂
絳騶不遠三千里
皓首親擎九十觴
龍衮朝衣供綵服
鸞回綸誥賁奎

章江城況是曾臨駐

公前視學江南

四代今增樂未央

少宰已有子將冠

壽筵盛事艷朝紳

青輔承恩許省親

接武

兩朝賢宰相疏封一品太夫人新勅正熟南蘭酒文錦

兼頒內府珍縱是家風慣清儉也應瑛管慶長春

再世調元佐郅隆更餘書翰壓羣雄

公書法爲天下第一

韋平有傳

難專美絳灌無文敢媿功久別豈期迎畫鷁舊情猶荷

問雕蟲剩誇年少依劉日伴食曾陪兩相公

余昔客公家文正師方官總憲

公亦爲孝廉每日常三人共飯不另設餐也

石菴相公一見卽誦余出京赴鎮安任時有萬里

風塵從此去百年天地幾人閒之句余久已忘

之并未留稿因公誦及覺此一聯似屬可存爰

補綴成篇錄之稿中

一官遙指粵西山曾有新詩唱出關
萬里風塵從此去
百年天地幾人閒已看墮水飛鳶點
幸早投林倦鳥還
慚愧驂鸞餘舊句尚煩公掛齒牙間

送石菴相公還朝

昔歲在己巳我初客公家謗劣不自知
跳擲矜非蛙公爲發其覆導之指南車
我雖未肯降默已開心芽夜談

剪絳蠟晨餐快肥羜

每共飯余嫌羊肉羶公特善啖

當時從游樂聯翩接翅

鴉先後筵詞苑才思紛天葩公獨結主知不藉門第

華敬厯遍中外入相宣黃祿我從解綬歸胸次忽槎枒
妄思鑽故紙不慕建高牙自此音塵邈雲霄隔泥沙何

期四十載重接笑語譁乞假爲親壽南來道里遐遂使
林下踪得復披絳紗喜公八十五老健杖不擎亮節表
臺閣高名朗雲霞餘事到揮毫蘇米不足誇他年青史
傳粹然無纖瑕而我一無成俯仰祇自嗟送別臨河干
離緒豈有涯心逐輪蹄遠目斷烟樹遮倘再期後會毋
乃願太賒惟當晚節香爲公歌黃花

臨別再口占一首

白頭猶著老萊衣假滿還朝四牡騑來爲稱觴增燕喜
去歌遵渚美鴻飛送公千里終須別剩我孤舟獨自歸
誼是故交年大耋臨分那不信依依

夜不寐戲作時文示龔孫

雨過新看月一痕庭齋寂歷似荒村疎窗燈燄孤螢閃
遠樹風聲萬馬奔書有夙緣情尚戀詩無新句稿難存
可憐良夜憑誰伴戲草時文起課孫

夜泛

峭涼貪夜泛坐久露華凝潦退秧皆補膝翻芋已登畦
如助街鼓犬不吠船燈何必深宵寐原無事夙興

揚舍見逃荒者感賦

我來暨陽住十日靜看逃荒人乞活家住蘇松夏潦災
至今八月尚沒膝田廬蕩盡覓生路數十人同一舟出
傳聞此地獨晏然老幼扶攜聚如蝨初來開口猶囁嚅
人給一錢感刺骨不三四日習已慣對人無復可憐色

臉皮漸老膽漸粗給錢稍遲意早拂嗚呼前後數日耳
人情變乃如此捷如飢渴能害心古來喪節固非一

海上

前年海賊覆盜舟百千盜殫滄波流方謂萑苻根已絕
不數載復黨類興初傳赤嵌城被掠賊刀竟砍官兜鍪
旋聞溫州出船哨大帥殉節血惻懷近來吳淞又警報
欲梗市舶司咽喉幾似前代倭寇擾橋竿如櫛騷邊陲
彼倭有家在本國有利則至無利休後來往往被創去
揚帆遂歸死首邱今則閩粵無家者卽以海面爲苑裘
生作鯨牙死魚腹活計在此肯改謀涉險風濤等平地
歛貲買船當良疇人間安得此樂土倘來之富不待求

長魚大肉日醉飽呼盧瑳雜譁衆咻夜深時或發高唱
滿天星月翔蛟虬共笑官軍鵲鵲隊風擲浪吼滾作毬
噫嘻乎既不能制其死命使遠遁又不能厚其生理俾
內投坐視飄然而來忽然去何時一網打盡無遺留雖
未盧循入滬濱漸恐徐福占甌洲私居蒿目一長嘆茲
事隱繫東南憂

常郡地高被水處少困下流災重米價驟增遂致
食貴今新穀將登民已寧貼惟聞蘇湖水尚未
退恐種麥猶遲是可憂耳

吾郡本不潦下流溺載背秦饑資晉粟城火及池魚旱
穫期將屆晨炊稍紓災區須種麥可得把犁鋤

米貴

曉市聲喧似湧濤爭營口食罄錢刀其言米價如梯級
一步升來一步高

只爲人多覺地褊

平聲

一人一畝尙難全孟子若生今

世敢復高談古井田

承平日久生齒日蕃若人
各百畝安得有如許田也

景德祥符脫亂離小兒鼓腹老會飴始知斗米三錢價
總在人稀地廣時

海角山頭已遍耕別無餘地可資生祇應釣盾田猶曠
吳可惜高空種不成

更從何處闢遐甌只有中郎解發邱或彷彿秦開阡陌例
盡犁墳墓作田疇

勾踐當年急生聚令民早嫁早成婚如今直欲禁婚嫁
始減年年孕育蕃

五風十雨惠民深物產猶難給釜鬻到此天心縱仁愛
也愁力薄不從心

斗米需錢四百餘真同珠價論鎔銖老夫翻借誇豪富
一日厨炊一斛珠

壽劉可行舅兄八十

歸然耆宿魯靈先宦績文名少輩行夜月琴聲單父室
春風帶草鄭公鄉一門子弟親陶鑄三世文詞力表彰

刻劉氏一家
文稿行世

要識老儒榮暮景添丁樂事助稱觴

新添
一孫

仕宦歸同理舊編黑頭昆弟兩皤然每欣求仲來荒徑

還仗殷兄銜少年

張丈厭兄見香山詩君長余二歲

剪燭深談三鼓後扶筇

緩步百花前往來二老風流在剩與人間說散仙

上塚卽景

十畝松陰景鬱葱秋來獨紉老丹楓天然畫出荆公句
萬綠叢中一點紅

外孫金臯京闈發解喜賦

喜聽星郵報賢書捷鹿鳴恰成吾宅相早決汝科名

臯弱

細有才余決其選到夢以孫女

辛苦三條燭飛騰萬里程渭陽推自出亦覺

有餘榮

鄉科年似我發解亦京闈

余年二十四舉京兆試臯年稚俱同

敢謝傳衣付須

乘破竹機遠書烏鵲喜暖浪鯉魚飛一第應連掇期登

鰲頂歸

余廷試卷進呈第一後改第三大魁僥倖衷心常憾然以此望之

過湯蓉溪墓

萬石家門八秩齡
望衡對宇每招尋
死無遺憾如公少
誼有相知獨我深
在人傳焚券惠歿時里輟相春音
卽今經過橋元墓
猶覺青葱宰樹森

答劉雲房大司馬寄問近狀

雲霧江天一草廬
沉淪久與故人疎
照嫌老醜幾憎鏡
視苦昏蒙欲廢書
僮當給扶防蹉去聲見楊誠齋詩跌
孫纔辟町
解軒渠頽唐暮景真堪笑
敢辱邵箋問起居

春蠶

滿箔春蠶食葉肥
腹絲抽盡作蛾飛
尚餘五色文章在

留與人閒織錦機

蔣立菴輓詩

少小交游到老成十年以長忝爲兄
正期伴我桑榆晚何意今翻哭後生

半年不斷藥爐熏轉側常資婢僕勤
看到呻吟牀第苦翻祈君早赴修文

病榻惓惓念析薪預愁身後藐孤貧
大家都有兒孫累誰是人間了事人

空中笙鶴引遊仙此事何須快著鞭
恐我他年無伴侶預先相待大羅天

蓬瀛仙馭杳難攀官本清華館閣班生死不離文字裏
聲名早在斗山閒縹緲麗製傳中禁碑版雄詞到百蠻
吟似春蠶絲吐盡化飛蛾去脫塵寰

歷朝記載萬牛毛同異紛如費別搔十七史從何處說

一家言已等身高

君著廿二史考異最精核

有疑好就靈犀照不朽何

須汗馬勞直自深寧王叟後又添困學析秋毫

庚年同譜幾人留百里相望兩白頭君去更無人可語
我來應有伴同遊後身定識仍金粟前路先看赴玉樓
一笑吾曹論壽命短長不在幾春秋

楊桐山輓詩

老去枯腸不作詩作詩多是輓歌詞寢門哭友連三日

兩淚幾如不斷絲

看花每歲荷開尊精飲真過石季倫自是老饕無口福

正思大嚼失屠門

君家杜鵬花皆名種每賜時必具精饌宴客余嘗有詩

頃刻花開七七仙歡場履舄故依然明年櫻筍厨誰設
灑淚東風泣杜鵬

聞時齋總憲蒙

恩以二品歸老感賦

霜威烏府肅行騶直木風多易感秋朝議自嚴賢者責
帝心終眷世臣優七旬老恰初衣遂二品歸仍畫錦遊
白嶽黃山相待久籃輿探勝亦風流

巢痕回首綠楊灣燈火書堂課晏閒

公從余受業常在澄懷園

卅載寒暄

雖久別兩家痛癢最相關寢邱田豈供千指奉禮廳猶

降萬山

公家在休寧萬山中

平日愛臨顏氏帖也書乞米落人閒

編詩

多生餘結習悞落藝林中踪跡三高士詩篇半放翁

放翁

詩萬首余幾半之

讀書雖得閒傳世有何功不及鋤犁手謀生力

自供

盤餐

盤餐頗亦具鮮肥入口嘗來異舊時自是脾衰滋味變

不關物性有遷移

古玉玲歌

刻玉為蟬形古人飲尾用以壓舌宣和博古圖謂之玲將盤溪出以見示索詩

蔣侯示我白玉蟬幽光逼人毛髮寒來從千年太陰裏

歛屍曾壓舌本乾殘骸敗齒爛成土獨此血漬紅斑斑
我笑古人太癡絕一副革囊已破裂何妨速朽化泥沙
乃競飾終塋窆窆縱有虞瑄夏璠璜詎返遊魂起僵魄
徒令發邱郎掘墳賊毒手交相碎枯腊淒涼金盃出人
間狼籍珠襦棄道側地下長眠倘有知懷璧其罪鬼應
泣胡爲古癡君更癡不祥之物翻稱奇傾囊購得自矜
寵如削廁蘭閨面皮昔含死人口今弄生人手將生替
死引親膚未死先同骨已朽身佩幾俛燕玉溫甕來或
索弁瓊取由來寶物不終淪特借暗投鍊形久多年凶
穢殉髑髏一旦晶熒燭星斗勸君他日勿附身恐又發
塚不脛走

戲作

九尺曹交自覺長盡傾一座氣飛揚蟪蛄安見青松老
魑魅終消白日光麟閣畫圖功不朽雞林詩句價爭償
曠觀自有無窮在汲汲何須蟻撼牀

李自壽蟪蛄啼青
松安見此樹老

野性

野性生來不耐間人人祝我壽如山與爲山也寧爲水
好去周流宇宙間

萬秋

自是江河亘古流其餘起滅總浮漚君看代代名人出
只說千秋不萬秋

李雨村觀察輓詩

久不接爾村書心竊憂疑將于野自京回曾晤
其弟編修君鼎元知已下世驚悼之餘以詩當

哭

緬陽音斷渺烟雲得信俄驚宿草墳斯世幾人真愛我

老年同輩又亡君和凝板散千家集文節樓傷萬卷焚

君搜刻說部數百種名曰函海又舉近人詩作詩話十六卷家有萬卷樓貯書甚富雖遭火奇士人間留不住故

應召掌紫臺文

見漢武外傳

每逢書到悵睽離今并音書不可期萬里難爲徐楫弔

一編重檢蜀州詩

少陵有檢得高蜀州遺詩

覓來夢裏人猶舊名在陽

間鬼豈知八表停雲空目極更從何處寄相思

戲簡稚存

青鞵布屨過從頻一道橫街作近鄰我已年來都散漢
君真天上謫仙人詩纔起草先邀和諍到交鋒不避真
如此清歡供暮景也應俗煞軟紅塵

再簡一首

遊戲紅塵兩散仙平生詩句已流傳虛名若論時長短
縱不千年也百年

漏盡

漏盡途猶遠宵行似逐逃只因豚犬劣未息馬牛勞枉
作千年計難供一口豪蓉湖烟雨泛慚愧昔人高

稚存答詩嫌百年太少蓋其才已獨有千古也再

簡奉酬

少陵見同輩不輕許必傳千秋萬歲名只屬李青蓮

李

自詩有

此句自揣身後名亦云垂萬年

蜀中詩丈夫垂名動萬年

其他高岑徒

但賞十數篇由來才大小可預定衡銓我才木蹄涔大名未嘗暇姑以百年計猶恐光易闇君也十倍才出語破萬膽橫矛奮一呼決死戰誰敢已視一世空曾經萬里貶笑我目寸光固難共遐覽而我私自喜得爲君執鞭昔唐有韓孟雲龍兩連翩宋亦有蘇黃旗鼓相周旋至今四勁敵輝赫在目前固知聲名播兼恃氣類聯孤掌最難鳴雙飛乃易驚與君共詩國

查初自詩聖陵自古稱詩國

狎主齊

盟壇已令天下士趨風快睹先稱君必及我纍如貫珠連藉君光燄長挈我聲價懸蒼繩附驥尾一日路亦千

不朽竟分我籍有厚幸焉

題錢筠村秋水靜觀圖

春水桃花浪夏水瓠子漲惟有秋水澄一碧涵萬象波
不湧千層底可見百丈自非靜者心孰肯寄遐尚筠村
早工文出手洪濶壯詞源三峽倒才力百川障中歲生
道心汪汪叔度量歛盡萬斛傾愛此一泓漾梧竹綠陰
中明流澹相向想見晏坐時襟期與同曠好添簞簪舟
更置書畫舫我常來從遊楓岸荻花蕩高咏滄浪歌不
作小海唱

稚存見題賤照有十萬黃金之嘲走筆戲答

秀才眼孔本不大原十萬青錢便塞破青錢忽變作黃

金驚喜橫財賒望過得毋折鈔非實支大似考賦竟懸
坐若果腰纏如此多跨鶴應愁半空墮古來藏金誰最
豐六十匱記安漢公武陵王懸一千餅張孝傑貯百萬
鉅彼皆倚勢哀歛多遂使精鏐堆作廩繫余出身故寒
陋得官稍藉俸錢救趨朝曾耐冰一條出守但矜風雨
袖歸來不及陸賈裝問舍求田俱未就老年生計略可
支不過賣文錢潤筆資作碑尚須斛斯索酬繚安有裴
相貽旣不能負貤帶鈴劫掠廣又不能點鐵鍊鉛變化
奇何當橫加金夫號祇洹布地名同馳今試與君較歲
入我僅錙銖營什一君挾大名驚世人廣致賂遺來絡
繹乞書幣湧李邕門問字酒填揚子宅居則坐收海賈

餽華出則滿載汴京獲元道山詩大船築室已規元暢樓為

園更迎到公石君新構精舍極水木竹石之勝漢上足穀翁江南多牛客總

作陸莊供取給是我有限君無窮黃金早向君家積想

應怕我為劉义先發制人防攘奪

述菴侍郎遣人送示新刻湖海詩傳所輯皆生平

交舊凡六百餘人人各系小傳其心力可謂勤

矣敬題六絕句

涉江踰嶺採芳蓀多是題襟舊墨痕辛苦雅輪扶隻手

故應一代仰龍門

有唐何止萬詩人篇什如今幾个存太息茫茫烟霧裏

不知多少暗啼冤

也是生平大願船盡收交舊入新編淮南賓友何多幸
得附劉安總上仙

萬骨枯成一將功唐詩選只說荆公由來牛耳冠裳會
專屬蔡邱霸主雄

往事傷心踏戰塼選詩特爲百篇增不知朽骨空山裏

可識歐陽序宛陵

選趙璞函詩獨盈一卷蓋公與璞函同從軍海蜀璞函已殉難木果未故存殺之感倍深亦可見篤於風義矣

對鏡親描兩翠蛾白矜絕豔渺橫波一從粉黛叢中過
始覺人間佳麗多

長至日同人夜集

長至纔交薄雪飛可無轟飲梓寒威書生豪舉真堪笑
前面開樽後典衣

吳穀人祭酒枉過草堂邀稚存味辛同集

裾屐聯翩總勝流
沉沉泥飲盡更籌
江天望氣人應說
今夜文星聚趙樓

已屆消寒九九天
燈光月影泛觥船
殺雞爲黍備家宴
俗煞汾陽軟脚筵

百年人物遞當場
館閣歸來鬢各蒼
公等已皆稱老輩
衰翁得不魯靈光

袁子蔣

心

餘王

鑑

錢

竹

汀

總

作

塵

慙

遺

漫

比

後

來

薪

名

流

各

有千秋在肯與前人作替人

冬暖

繡線雖添暖未消
想天亦怕聽寒號
晏嬰尚有狐裘在

不得披來傲緼袍

負暄牆角坐欹斜挾纈人人笑語譁已勝香山裘萬丈
誰言冬日只吾家

春令冬行暖不裘漫憑洪範細推求陰陽調燮何關汝
偏是書生易杞憂

曾歷天南氣候溫冬裘夏葛少區分只當縮地來江國
正月流螢臘月蚊

示兒孫

風貌居然玉樹枝未遑講道且修詞要無一字無來處
但有三人有我師祖父聲光安可恃衣冠門戶倍難支
暑猶餘粟囊餘帛不惜分陰待幾時